

Serri: torrat a su connotu sa de 178 editzionis de sa Fiera de Santa Luxia

In Serri sa Fiera de Santa Luxia est un'eventu de importu stòricu. Incumentzau in is annus Binti de su 1900 comente fiera de bestiàmini, in su tempus at allogau is piessinnus suos de promotzioni de su territòriu, ammostu de is resursas localis e avaloramentu de is traditzionis. Si fait duas bortas a s'annu, in su de tres domìnigus de su mesi de maju e de cabudanni.

IS ORÌGINIS

In s'antighidadi, acabbaus is traballus de aradura in beranu, is messajus acostumànt a s'atobiai in Santa Luxia po fai ammosta, còmpora e bédida de pegus. A bortas bendiant su juu po non ddu dèpiri mantènniri in s'istadi e ddu torrànt a comporai in s'atòngiu. Fuat un'ocasioni po arrennoai is ceddas, po agatai bonus afàrius, ma fintzas po s'agatai, s'arrelatai, cumpartziri oras e diis de ibàsiu e de spàssiu. Lompiat genti de is campidanus, de su sassaresu e de medas àterus logus, e totus agatànt a chini ddus arriciat. Sa fiera duràt fintzas e una cida, fuat aici manna chi si sterriat de is terrenus a ingìriu de sa crésia imprassendi totu is cungiaus. In bidda contant ca is òspitis benius de aillargu agatànt arrecatu non feti in is fràigus postus a disponimentu in Santa Luxia, ma fintzas aintru de Serri etotu: duncas nasciant retzas e amighéntzias, e is afrontas de is bois in is murus de is pratzas fuant sinnalis de bonu acatu po su stràngiu.

IS ISFIDAS DE SA MODERNIDADI

Passendinci is annus, essendu mudau su mundu de su traballu cun s'agiudu de sa mecànica e de sa tennologia, is messajus no ant prus tentu abbisòngiu de is animalis po traballai. Tandus a bellu a bellu sa fiera at mudau punna, s'est oberta a su mundu de sa pastoria e diventau logu de ammosta po variedades ovinas, poderendi sèmpiri sa cara sua de grandu vetrina po sa produzioni alimentari e artigianali locali.

S'EDITZIONI 2025

Ocannu, in ocasioni de s'atòbiu de domìnicu, su 18 de maju, s'organizazioni de Santa Luxia at circau de torrai a su connotu e nd'at pesau un'editzioni arrica de propostas turísticas e culturalis, donendi atentu particulari a sa tradizioni antiga e a sa preséntzia de is animalis. Difatis, una dexina de esposidoris ant curau s'ammosta de animalis comente bacas, bois, cuaddus, berbeis, crabas, cunillus e puddas de medas calidadis, agiudendi s'abbisitadori a s'acostiai a su mundu de s'allevamentu e iscobèrriri sa relata cun sa terra. Un'àtera bintina de esposidoris ant promòviu e béndiu is produtus artigianalis e alimentaris de su territòriu, e non funt mancaus is laboratòrius obertus a totus po imparai a fai su casu, su pani e is durcis tìpicus de sa tradizioni serresa. A meri is abbisitadoris ant pòtziu tastai sa frégula e is pitzotis traditzionalis de Serri, a pustis de àiri assistiu a sa produzioni oberta a totus a incuru de is espertas de sa bidda.

Mùsica e ispetàculus ant animau sa gerronada de festa cun grupus folk, corteus istòricus, giogus e ispetàculus ètnicus. Est istau unu grandu suzessu de pùblicu, cun preséntzias a tres bortas tanti cunformas a ocannu passau e genti lòmpia de ònnia zona de Sardinnia.

S'obietivu de s'amministratzioni comunali est cussa de sighiri a afortiari sa manifestada circhendi de ammanniai ancora de prus sa preséntzia de is animalis po is editzionis a bènniri, contendi sèmpiri a pitzus de sa collaboratzioni cun is operatoris de s'economia rurali e cun sa punna de avalorai in sa mellus manera su patrimoniu culturali acapiau a sa fiera stòrica de Santa Luxia.